

barque qui n'estoit pas loin, équippa viste vne chaloupe pour venir au secours, ayât entédu les cris du combat, il est croyable que pas vn n'en fut échappé. Les Hiroquois voyant cette harquebuse, & ceste autre chaloupe qui venoit au secours, s'enfuirent, écorchans au preallable les testes de ceux qu'ils auoient tuez, remportans ces peaux par brauade.

Le 8. de Iuin, le Pere Masse arriua de Tadoussac, il réueilla nostre ioye, voyant qu'apres auoir esté si long temps malade sur la mer, il se portoit bien. Il nous dit que Pierre Pastedechouan estoit plus meschant que iamais. Que les Anglois qui estoient à Tadoussac l'auoient perdu par l'yurognerie : O que celuy-là sera coupable deuant Dieu, qui a introduict l'heresie en ces contrées ! Si ce Sauuage auoit de l'esprit, estant comme il est corrompu par ces miserables